

KUOA bantu usahawan Orang Asli

BANGI – Bagi melahirkan lebih ramai usahawan dalam kalangan Orang Asli, seramai 50 usahawan terlibat dalam Karnival Usahawan Orang Asli (KUOA) yang berlangsung di Stadium Sungai Besar, Sabak Bernam bermula semalam.

Karnival yang dilaksanakan bersempena Program Sentuhan Kasih Desa itu adalah hasil gabungan dua karnival utama Kementerian Kemajuan Desa dan Wilayah (KKDW) iaitu Mini KUD dan KUOA yang berlangsung selama tiga hari dan akan dirasmikan Perdana Menteri, Datuk Seri Anwar Ibrahim.

Karnival ini dijayakan dengan penglibatan 5 agensi di bawah KKDW iaitu Jabatan Kemajuan Orang Asli (Jako), Majlis Amanah Rakyat (MARA), Pihak Berkuasa Kemajuan Pekebun Kecil Perusahaan Getah (RISDA), Jabatan Kemajuan Masyarakat (KEMAS), dan FELCRA Berhad selain penglibatan dari Bahagian Pembangunan Usahawan Desa (UD), Pejabat KKDW Negeri Selangor, serta kerjasama daripada Pejabat Belia dan Sukan Daerah Sabak Bernam.

Bagi KUOA, program tahunan ini melibatkan usahawan Orang Asli daripada suku Temiar, Temuan, Semai, Semelai, Kuala dan Mah Meri melibatkan enam buah negeri iaitu Pahang, Perak, Kelantan, Negeri Sembilan, Johor dan Selangor.

Ketua Pengarah Jako, Sapiah Mohd. Nor berkata, objektif pelaksanaan karnival tersebut adalah untuk membantu usahawan luar bandar terutama Orang Asli meluaskan pasaran produk dan perkhidmatan masing-masing ke arah peningkatan pendapatan.

Jelasnya, gabungan dua program keusahawanan di bawah KKDW di Sungai Besar itu juga merupakan salah satu platform kepada usahawan Orang Asli bagi memantapkan kemahiran komunikasi dan teknik penjualan, pemasaran bagi memperkukuhkan kekuatan produk serta perkhidmatan yang diusahakan.

Tambah beliau, bagi penganjuran karnival itu, pihaknya telah menerima lebih 100 permohonan untuk membuka reruai.

“Namun, hanya 50 usahawan Orang Asli yang terpilih dari pelbagai kategori (produk herba, kraf tangan, eko pelancongan, makanan, nurseri dan produk kecantikan).

Sapiah berkata, sehingga Disember 2022, terdapat 733 usahawan aktif yang berdaftar dan daripada jumlah itu, Jako telah menyalurkan bantuan perniagaan kepada 47 usahawan Orang Asli.

Menurutnya, Jako sebagai penggerak kemajuan ekonomi masyarakat Orang Asli turut menyediakan beberapa bentuk bantuan bagi membantu memantapkan usahawan dan koperasi Orang Asli.

“Bagi usahawan Orang Asli, Jako menyediakan Program Bantuan Bimbingan Usahawan yang meliputi dua jenis bantuan iaitu pertama pembinaan premis perniagaan termasuk bengkel tidak melebihi RM50,000 dan kedua, pemberian peralatan serta mesin ringan dengan jumlah tidak melebihi RM30,000.

“Bagi koperasi Orang Asli, Jako menyediakan Program Bantuan Geran Koperasi Orang Asli dengan maksima jumlah RM500,000 meliputi bantuan premis perniagaan, peralatan, mesin, projek-projek ekonomi seperti pertanian, ekopelancongan, peruncitan serta pengangkutan.

“Bagi memohon bantuan-bantuan ini, usahawan dan koperasi Orang Asli yang berminat boleh berhubung dengan Pejabat Jako Daerah masing-masing pada bila-bila masa,”katanya.

Sementara itu, menyentuh mengenai karnival selama tiga hari itu, Sapiah memberitahu beberapa keunikan dan aktiviti yang menanti pengunjung antaranya, mini perkampungan Orang Asli yang menampilkan tiga jenis rumah masyarakat Orang Asli iaitu kaum Mah Meri, Semai dan Temuan serta tarian sewang mengikut tiga kaum terbabit.

“Program ini turut mempersembahkan tarian dari kumpulan “Jooh” yang menampilkan satu tarian topeng yang pasti memikat pengunjung. Kumpulan ini juga telah banyak membuat persembahan di dalam dan luar negara.



22 JULAI 2023



Photo by ukk@kkdw